

MEI 2025 / BIL. 13 / 2025

EON

Epitome of Nature

PENDIDIKAN BERKUALITI



MAJALAH PP BIOLOGI
UITMCNS

ISSN 2773-5869



9 772773 586005

PODCAST: REVOLUSI PENDIDIKAN BERKUALITI

Faizah Baharudin

Pusat Asasi, Universiti Teknologi MARA, Cawangan Selangor,
Kampus Dengkil, 43800 Dengkil, Selangor.

faizah7806@uitm.edu.my

EDITOR: MU'ADZ AHMAD MAZIAN

Pendidikan berkualiti merujuk kepada proses pembelajaran yang memberikan pelajar bukan sahaja pengetahuan asas, tetapi juga kemahiran kritikal, nilai murni, dan sikap positif yang diperlukan untuk berjaya dalam kehidupan. Perspektif pendidikan berkualiti ini melibatkan kurikulum yang relevan, pengajaran yang berkesan, serta sokongan daripada semua pihak. Ia juga penting dalam memastikan semua pelajar, tanpa mengira latar belakang, mendapat akses yang setara kepada peluang pendidikan yang baik.

Pendidikan berkualiti bukan sahaja bergantung kepada kurikulum dan guru yang berkecayaan, tetapi juga kepada penggunaan teknologi yang mampu memperkaya pengalaman pembelajaran. Salah satu medium yang semakin popular dan berkesan dalam pendidikan adalah podcast. Podcast, sebagai platform audio yang fleksibel, menawarkan pelbagai kelebihan dalam mewujudkan pendidikan yang lebih inklusif, menarik, dan mudah diakses. Ramai sedia maklum akan kelebihan podcast dalam membentuk insaniah yang dinamik dalam golongan muda.

Tidak kurang juga pengkritik yang melihat fenomena ini sebagai salah satu ancaman yang boleh meracun minda anak muda. Walau apapun persepsi pelbagai pihak, tumbuhnya Podcast dewasa ini yang bagaikan cendawan tumbuh selepas hujan, perlulah dilihat sebagai satu revolusi yang tidak dapat dibendung. Maka, para pendidik khususnya haruslah bijak menggunakan platform ini sebagai salah satu medium untuk mewujudkan pembelajaran berkualiti.

Podcast dalam pembelajaran menawarkan fleksibiliti, membolehkan pelajar belajar pada bila-bila masa dan di mana sahaja. Ia memperkaya pengalaman pembelajaran dengan perbincangan interaktif dan mudah difahami, membantu pelajar mendalami topik lebih mendalam. Selain meningkatkan kemahiran mendengar dan tumpuan, podcast juga mengurangkan kebergantungan pada bahan visual. Aksesnya yang mudah melalui internet membolehkan pelajar dari pelbagai latar belakang, termasuk kawasan luar bandar, untuk belajar dengan lebih fleksibel.

Podcast memainkan peranan penting dalam membentuk

kemahiran kritikal, nilai murni, dan sikap positif yang diperlukan untuk pendidikan berkualiti. Dengan kandungan yang beragam, podcast memberi pelajar peluang untuk mengembangkan pemikiran analitik dan penyelesaian masalah melalui perbincangan topik yang mencabar. Ia juga memperkenalkan pelajar kepada pelbagai perspektif dan nilai, membina empati dan kesedaran sosial. Selain itu, podcast sering mengangkat isu-isu penting seperti etika, kepimpinan, dan kerjasama, yang menggalakkan pelajar untuk mengamalkan sikap positif dalam kehidupan seharian. Dengan cara ini, podcast bukan hanya sebagai sumber pengetahuan, tetapi juga sebagai alat untuk membentuk karakter yang baik dalam pendidikan.

Keluar Sekejap, The Champions Podcast, dan CikguSpeaks Podcast adalah antara podcast Malaysia yang menengahkan topik-topik ringan dan santai, tetapi penuh dengan pengajaran dan perspektif yang menarik. Dihoskan oleh dua orang pengacara yang berbual tentang pelbagai isu kehidupan sehari-hari, podcast ini menawarkan perbincangan tentang pengalaman peribadi, cabaran hidup, serta tips untuk kesejahteraan mental dan emosi. Dengan gaya penyampaian yang mesra dan tidak formal, podcast-podcast ini memberi peluang kepada pendengar untuk merenung, berhibur, dan mendapatkan motivasi dalam bentuk yang

mudah difahami. Podcast ini sangat sesuai bagi mereka yang mencari pengisian positif sambil menikmati hiburan ringan. Melalui topik-topik ini dan podcast-podcast berkualiti, pendengar dapat memperoleh pengetahuan yang bukan sahaja akademik, tetapi juga tentang kehidupan, kemahiran sosial, dan sikap yang positif, sekaligus menyumbang kepada pendidikan yang berkualiti.

Bagi memastikan podcast memberi impak yang positif terhadap pendidikan berkualiti, ia perlu digabungkan dengan pendekatan pengajaran yang lebih luas.

Guru dan pendidik boleh memanfaatkan podcast sebagai bahan sokongan untuk pengajaran tradisional, menyediakan sumber tambahan bagi pelajar yang ingin mempelajari lebih lanjut atau menghadapi kesukaran dalam pemahaman pelajaran. Antara elemen penting yang perlu dilaksanakan seiring dengan matlamat menghasilkan golongan muda yang berfikiran kritis adalah perbincangan bersama guru di kelas. Langkah ini adalah penting bagi memastikan para pelajar peka akan isu semasa dan melihat sesuatu perkara atau isu itu dari aspek yang betul dan tepat.

Perbincangan berkenaan topik yang dibincangkan di podcast ini dapat menjadikan integrasi podcast dalam pendidikan sesuatu yang positif dan berdaya saing.

Kesimpulannya, podcast adalah medium yang sangat berpotensi untuk meningkatkan kualiti pendidikan. Dengan sifatnya yang fleksibel, interaktif, dan mudah diakses, podcast mampu memperkaya pengalaman pembelajaran pelajar, memberikan mereka lebih banyak peluang untuk belajar, serta memastikan pendidikan berkualiti dapat dinikmati oleh lebih ramai orang tanpa halangan.